



Pečat slobodi 2012



Tradicionalna predbajramska posjeta Centru Duga



Odgajatelji sa Biroa rada angažirani u projektu Općine Cazin i UNICEF-a



Nova fontana na centralnom trgu

Uvodna riječ NAČELNIKA OPĆINE

Dragi sugrađani, prijatelji, posjetioци



Pred Vama se nalazi XIII broj našeg informativnog biltena CaZINfo. Iznimno smo ponosni što se ova publikacija kontinuirano izdaje i time čuva sjećanje na važne događaje, projekte, planove i njihove učesnike. Ovim biltenom Vam želimo reći da nam je stalo do Vaše informiranosti, Vašeg aktivnog učešća u procesima koji se odvijaju u našoj lokalnoj zajednici, kao i do Vaših prijedloga, mišljenja i ideja. Sve što radimo radimo zato da nam sutra bude bolje, da našu općinu učinimo ljepšim mjestom za život i da možemo stati rame uz rame sa drugim sredinama u našem okruženju. EU kuca na vrata susjedne zemlje, čime ćemo biti na pragu ove velike zajednice naroda i moraćemo usklađivati naša pravila poslovanja i rada sa onim evropskim. Zbog toga, važno je da date svoj doprinos aktivnoj izgradnji demokratske zajednice,

da učestvujete u društveno korisnim projektima i da budete bolji prijatelji međusobno kako bi to sve bilo lakše izvodivo.

Nadam se da ćete na ovim stranicama pronaći nešto što je u domenu Vašeg interesovanja. Ujedno Vas sve pozivam da dodatne informacije potražite na našoj službenoj web stranici, u našem Centru za pružanje usluga građanima, ili putem mnogobrojnih brošura, letaka i drugih printanih materijala, od kojih su mnogi dostupni i online.

Želim Vam svima svako dobro.

OPĆINSKI NAČELNIK
mr. Nermin Ogršević

Prijem u kabinetu za Dan općine

Povodom 6. augusta, Dana općine Cazin načelnik Ogršević je u kabinetu primio zvaničnice, koje su došle da uveličaju ovaj događaj i prisustvuju centralnoj manifestaciji „Pečat slobodi“.

Pored Stjepana Mesića, bivšeg predsjednika R. Hrvatske, prijemu je prisustvovao i legendarni komandant 5. Korpusa general Atif Dudaković, ministar za boračka pitanja u Vladi USK-a Mirsad Topčagić, predsjedavajući Skupštine USK-a Admir Hadžipašić, predstavnici MIZ Cazin i drugi.

Bila je ovo prilika da se napravi osvrt na proteklih 17 godina od oslobođenja, ali i na određena događanja iz samog odbrambeno-oslobodilačkog rata. General Dudaković je govorio o ovom datumu, koji je označio deblokadu USK-a, definitivno oslobađanje ne samo općine Cazin, nego rješavanje Republike Zapadna Bosna i praktično stvaranje preduslova za dalje oslobađanje naših teritorija.

„Cazinjani se na ovaj način prisjećaju onih koji su dali svoje živote u protekloj borbi, prisjećaju se tih slavni dana kada je nemoguće postalo moguće. Nakon 1.200 dana u okruženju, mi smo se oslobodili, ostali smo svoji na svom, bez obzira na poteškoće koje smo imali i nedostatke koje smo prevazišli. Volja, hrabrost i upornost su pobijedile“, rekao je general Dudaković.

Stjepan Mesić je izrazio zadovoljstvo ponovnim boravkom u Czinu.

Načelnik ugostio dobitnike najvećeg ratnog priznanja

U povodu Dana općine i ove godine je na poziv općinskog načelnika došlo do okupljanja dobitnika najvećih ratnih priznanja sa područja općine Cazin. Prema evidenciji ovog Udruženja, na području naše općine je 65 dobitnika, odnosno njihovih pravnih nasljednika, od kojih se većina odazvala pozivu općinskog načelnika na ovo zajedničko druženje. Kraći susret u kabinetu općinskog načelnika iskorišten je za evociranje uspomena na dešavanja iz proteklog odbrambeno-oslobodilačkog rata, a kao svake godine i ovom prilikom načelnik je svima uručio prigodne poklone.

U razgovoru sa svojim gostima, načelnik Ogršević je istaknuo važnost okupljanja i odavanja počasti onima koji su najzaslužniji za slobodnu BiH. „Uvijek to ponavljam, pa i sada ću. Ovo radimo zbog onih koji su dali svoje živote na putu borbe za slobodu, ali i zbog onih

„Osjećam se danas posebno, jer sam došao na poziv vođa ove općine. Drago mi je da sam došao, a posebno mi je drago kada vidim koje je uspjehe općina Cazin postigla. Dakle, to je neprepoznatljivo. To je sasvim novi izgled grada. Mislim da je to ujedno dokaz da lideri ove općine, zajedno sa svojim građanima, zaista vole ovu sredinu“, riječi su ovog velikog čovjeka iz političke historije naše susjedne zemlje.

Općinski načelnik Nermin Ogršević iskoristio je priliku da upozna goste sa stanjem u općini Cazin i da gospodinu Mesiću predstavi problem malograničnog prelaza Tržačka Raštela, na čije se rješavanje čeka godinama. Tražio je da svojim autoritetom pokuša pokrenuti ovo pitanje u pravcu njegovog definitivnog otvaranja i stavljanja u funkciju. Ovom prilikom načelnik Ogršević je gostima uručio i prigodne poklone kao znak sjećanja na ovaj susret.

Nakon razgovora u kabinetu, gosti su zajedno sa domaćinom obišli i centralno šehidsko obilježje, gdje su položili cvijeće..



koji tada nisu bili ni rođeni, kako bi danas, a i sutra, znali svoju prošlost i prošlost svojih roditelja“, riječi su prvog čovjeka naše općine.

Rasim Pajić, podpredsjednik cazinskog Udruženja dobitnika najvećih ratnih priznanja, zahvalio se u ime svih prisutnih i iskoristio priliku da ih pozove na predstojeće manifestacije koje će se održavati u povodu Dana općine.

Nakon prijema u kabinetu posjećeno je centralno šehidsko obilježje i proučena fatiha pred duše onih koji su svoje živote ugradili u temelje slobode Bosne i Hercegovine.



Krajem septembra tekuće godine u službenoj posjeti Općini Cazin boravio je Šef banjalučke kancelarije Ambasade SAD u BiH Aaron M. Schwoebel sa svojim saradnicima. U kabinetu ga je primio načelnik općine Nermin Ogršević i njegovi savjetnici. Razgovaralo se o aktuelnim problemima u administraciji, biznisu, poljoprivredi i aktuelnoj predizbornoj kampanji.



Prema riječima načelnika Ogrševića, Cazin se danas može pohvaliti svojim izgledom, infrastrukturom, poslovnim uspjesima, realiziranim projektima i svakako vrlo vrijednim ljudskim resursima. U svom obraćanju načelnik je ukazao na značajne prednosti naše lokalne zajednice u odnosu na druge sredine i pojasnio glavne probleme sa kojima se susreće aktuelna administracija u pružanju usluga svojim građanima. Razgovarali su i o poljoprivredi kao strateškoj grani privrede općine Cazin. Prvi čovjek naše općine je tim povodom izjavio: „Povećali smo poticaje u poljoprivredi za 300% u odnosu na 2008. godinu. Ove godine Općina planira izdvojiti 560.000,00 KM u svrhu poticaja. Time pokazujemo svoje opredjeljenje za podršku ovoj grani privrede. Međutim, smatramo da i viši nivoi vlasti trebaju smanjiti ili ukinuti svoje uslove za poticaje, jer su, u najmanju ruku, diskriminirajući prema malim poljoprivrednim proizvođačima.“

Gosti su posebno bili zainteresirani za buduće planove načelnika, njegova predviđanja rezultata izbora i ključne prepreke u procesu saradnje lokalne zajednice i viših nivoa vlasti. Sastanak se završio u ugodnoj atmosferi uz srdačne čestitke načelniku i njegovim saradnicima na postignutom uspjehu.

Druga polovina godine u našoj općini obilježena je realizacijom mnogobrojnih infrastrukturnih projekata i početkom novih. Tim povodom je u prostorijama općine Cazin potpisan Sporazum o uslovima učešća u realizaciji projekata iz sektora vodoprivrede između Ministarstva poljoprivrede, vodoprivrede i šumarstva USK-a i Općine Cazin. Ovim Sporazumom utvrđuju se obaveze i odgovornosti Ministarstva i Općine u realizaciji projekta izgradnje gravitacionog cjevovoda Gornja Koprivna/rezervoar Nišan. Sporazumom je utvrđeno da će izgradnja navedenog cjevovoda iznositi oko 250.000,00 KM, od čega će Ministarstvo investirati 100.000,00 KM, a Općina Cazin 150.000,00 KM. Potpisnici Sporazuma su načelnik Nermin Ogršević i Ministar poljoprivrede, vodoprivrede i šumarstva USK-a Amir Džajić.

„Mi smo već 2008. godine zaokružili sistem vodosnabdijevanja na području cijele Općine i obezbjedili vodoopskrbu za svako naše domaćinstvo. Ovaj Sporazum koji smo danas potpisali u funkciji je ojačavanja sistema vodosnabdijevanja jer ćemo doći u poziciju da imamo veće rezervoarske kapacitete, što znači da ćemo moći da odgovorimo na izazove koji nas čekaju u ljetnim mjesecima kada dolazi do najintenzivnije potrošnje vode. Imamo u planu rekonstrukciju starijih dijelova vodovoda na području naše općine, a posebno užeg dijela grada. Ako želimo da imamo kvalitetnu vodoopskrbu moramo svake godine ulagati u istu i samim tim održavati vodovodni sistem. U proteklom periodu je za završetak sistema vodosnabdijevanja uloženo oko 15 miliona KM. Općina Cazin je zainteresirana za partnerske projekte, što potvrđuje i potpisivanje ovog Sporazuma u kome učestvujemo sa 150.000,00 KM“, rekao je načelnik Ogršević.



Trećeg dana mjeseca septembra u službenoj posjeti Općini Cazin boravio je potpredsjednik FBiH Mirsad Kebo. Kako je i sam rekao, ovaj sastanak je rezultat posjete nekolicini općina u BiH, sa ciljem da se identificiraju dobre i loše strane funkcionisanja lokalne samouprave i njihove saradnje sa višim nivoima vlasti. Potpredsjednika FBiH je u svom kabinetu dočekao načelnik općine Nermin Ogršević sa svojim saradnicima, među kojima su bili i Ministar za pitanja boraca u Vladi USK Mirsad Topčagić, Predsjedavajući Skupštine USK Admir Hadžipašić, Predsjedavajući OV Cazin Haris Čoralić, sekretar OV Cazin Nermin Kljajić i direktor Razvojne agencije Cazin Amir Mulalić.

U uvodnom dijelu razgovora, gospodin Kebo je naglasio svoje oduševljenje stanjem koje je zatekao u općini Cazin u pogledu izgradnje infrastrukture i uređenja gradskog i prigradskog područja. Prema njegovim riječima, općina Cazin korača krupnim koracima prema ispunjenju najvažnijih potreba svog stanovništva i u skladu s tim može se reći da spada u sami vrh općina koje ispunjavaju osnovni cilj svog postojanja. „Za Cazin se još može reći da je općina koja njeguje pozitivnu energiju i ulaže u omladinu, budući da njeno rukovodstvo spada u mlađu generaciju, čime smo na tragu toga da mladima prepustimo privredni i društveni napredak naše zemlje“, riječi su potpredsjednika FBiH Mirsada Kebe.



Ono što je načelnik Ogršević istaknuo kao bitne odrednice razvoja općine u posljednjim godinama pokazalo se kao vrlo dobar model za realizaciju planiranih projekata i aktivnosti, prema mišljenju gospodina Kebe. Načelnik je dodao da za općinu Cazin trenutno najveći problem predstavlja elektro-snabdijevanje, odnosno niskonaponska mreža, budući da je to sektor na koji lokalna zajednica ne može posebno da utječe, a značajan je za svu preostalu infrastrukturu.

„Problem imamo i u signalima BHT i FTV-a, budući da se u nekim područjima naše općine uopće ne mogu gledati ovi televizijski kanali“, naglasio je načelnik Ogršević. Dodao je i to da se saradnja sa višim nivoima vlasti nalazi na dosta lošem nivou i da nije zadovoljan povratnom informacijom pojedinih institucija koje se obično zadržavaju na državnom nivou i zaboravljaju jedinice lokalne samouprave. Zaključak današnjeg susreta jeste identificiran set problema za koje će Potpredsjednik FBiH, gospodin Kebo, pokušati naći adekvatno rješenje u okviru svojih mogućnosti i ustavnih rješenja, ili bar apelirati nadležnim institucijama da se uključe u njihovo rješavanje.

II NOVI PROJEKTI U OPĆINI CAZIN

Novo igralište kod dječijeg obdaništa

U okviru Projekta upozoravanja na opasnost od mina kojeg provodi Crveni križ BiH obnovljeno je dječije igralište JU Dječije obdanište „Hasnija Omanović“ u Cazinu. Ovaj projekat se realizira u partnerstvu između Međunarodnog komiteta Crvenog križa za BiH, Crvenog križa FBiH, USK i općinskog ogranka u Cazinu, a uz veliku podršku lokalne zajednice i općinskog načelnika.



Prema riječima načelnika Ogrješevića, vrlo bitna planska aktivnost u narednom periodu je uklanjanje mina na ovim prostorima. „Naš cilj je u što kraćem roku očistiti Cazin od mina i zaostalih minsko-eksplozivnih naprava. To je već definisana i pokrenuta aktivnost i smatram da je cilj opravdan i realno dostižan. Iznimno mi je drago da imamo dobru saradnju sa Crvenim križom na svim nivoima, a našem općinskom ogranku čestitam na uspješnom i predanom radu. Smatram da ovo igralište ima mnogo veću vrijednost od one materijalne koliko je plaćeno za njegovu rekonstrukciju, jer će služiti našoj djeci i njihovoj sreći, a to se naravno ne može platiti“, riječi su načelnika općine.

U ime partnera u projektu izjavu je dao generalni sekretar Crvenog križa FBiH gospodin Namik Hodžić i poručio da će se ovakve akcije nastaviti i u narednom periodu, jer je važno upozoravati ljude na opasnost od mina i čuvati buduće naraštaje.

Nakon toga delegacija je prisustvovala priredbi koju su mališani pripremili ovim povodom. Uručene su i zahvalnice za sve učesnike i partnere u projektu.



Novo: mParking usluga u našoj općini

Početak oktobra načelnik općine Nermin Ogrješević poslao je prvu SMS poruku putem mParking-a i time ozvaničio puštanje u funkciju i ove usluge za svoje sugrađane na parking u ispred TC „Ljiljan“. Riječ je o mogućnosti plaćanja parking mjesta putem SMS-a, kao i produžavanje istog za određeni vremenski period bez potrebe kupovanja tiketa na parkomatu ili dolaska na parkiralište.

Tim povodom je načelnik Ogrješević dao izjavu za medije u kojoj kaže: „Ovakve usluge su samo dio naših planova za urbanizaciju i modernizaciju užeg gradskog jezgra. Svi projekti nisu u potpunosti završeni, ali njihova realizacija slijedi u narednom periodu. U sklopu ovakvih inovacija imamo predviđene i rekonstrukcije ulica oko Trga Alije Izetbegovića i Trga Zlatnih ljiljana, čime ćemo upotpuniti izgled naše čaršije. Zaista nam je u interesu uljepšati ovu općinu na način da slika sama govori o njenom razvoju, ljudima, dešavanjima i sl.“

Uslugu mParking uvelo je JKP „Čistoća“ Cazin koja i upravlja površinama javnog parkinga na prostoru naše općine. Dio je to ponude koja će omogućiti lakši pristup i jednostavnost korištenja usluge parkiranja u bilo kojoj zoni, budući da će plaćanje moći biti izvršeno u bilo kom dijelu naše općine. Ugovor sa BH Telecomom je potpisan na godinu dana i biće produžen njegovim ne raskidanjem nakon isteka ovog perioda. Uslugom se mogu koristiti isključivo korisnici brojeva ovog telekom operatera (061, 062 i sl.) Plaćanje se vrši jednako po utvrđenim zonama i cijena parkinga ostaje ista.



Uručeni ključevi stanova porodicama boračkih populacija

Novo zgrada za zbrinjavanje boračkih populacija u Cazinu svečano je otvorena 22. augusta 2012. godine. Nakon intoniranja himne, velikom broju okupljenih građana, dužnosnika općinskog i kantonalnog nivoa, obratio se Ministar za pitanja boraca u Vladi USK Mirsad Topčagić.

Prema njegovim riječima ovaj projekat je realiziran u saradnji Općine i Vlade USK, a njegova vrijednost iznosi oko 2 miliona KM. „O značaju projekta je suvišno govoriti, s obzirom da se radi o obezbjeđivanju krova nad glavom za porodice poginulih boraca, ratnih vojnih invalida i demobilisanih boraca. Upravo onih koji su najzaslužniji za našu slobodu i očuvanje teritorijalnog integriteta i suvereniteta naše domovine“ riječi su Ministra Topčagića.

Svečanosti su, između ostalih, prisustvovali i Premijer USK Hamdija Lipovača, Ministar unutrašnjih poslova USK Šefik Smlatić, Ministar zdravstva Amir Murić, kantonalni zastupnici i općinski vijećnici. Uvaženom skupu se obratio i premijer Lipovača, naglašavajući dobru saradnju sa Općinom Cazin i općinskim načelnikom.

„U proteklom periodu smo bili u koaliciji sa nekim drugim političkim prijateljima i svjedoci smo pogrešnog ili usporenog rada takvih političkih kompromisa. Danas smo zahvaljujući strankama A-SDA i SBB odblokirali mnogobrojne procese i realizirali velike projekte. Jedan od takvih jeste i ova zgrada za zbrinjavanje boračkih populacija. Zaista mi je drago da sam prisustvovao ovom činu i ponosan sam što smo pomogli da ljudi napokon usele u svoje stanove i započnu kvalitetan život“, izjavio je premijer Lipovača.

U nastavku programa, svojim sugrađanima i gostima, obratio se i načelnik općine Cazin Nermin Ogrješević.



decembar 2012. / broj XIII

„Ovaj dan je za mene posebno radostan, ali vjerujem da je veća radost za one koji će, ako Bog da, živjeti u ovoj zgradi. Projekat izgradnje ove zgrade je imao svoj tok, kao i mnogi drugi. Žao mi je da su se u tom procesu dešavale opstrukcije, kako nekih političkih subjekata, tako i nekih boračkih populacija. Obećavam da se to više neće dešavati, jer ćemo nastojati eliminisati svaku pogrešnu ili zlonamjernu partnersku ponudu. Općina je uložila značajna sredstva u ovaj projekat i obezbijedila zemljište, projektnu dokumentaciju i svu moguću logistiku. Radimo to za naše borce i članove njihovih porodica. Radimo to za njih jer su to najviše i zaslužili“,

rekao je načelnik Ogrješević i dodao da je Općina Cazin jedina na našem kantonu koja u potpunosti ispunjava obaveze iz Zakona o dopunskim pravima boraca i da je jedina za tu namjenu u proteklom periodu izdvojila oko 4 miliona KM.

Svakako da je vrhunac svečanosti bila primopredaja ključeva vlasnicima stanova. Ugovore su potpisali sa JU „Komunalno-stambeni fond“, a ključeve im je uručio načelnik Ogrješević.



Ministar Topčagić



Počela izgradnja nove džamije u naselju Vilenjača

U subotu je, 27. augusta, na području MZ Stijena u naselju Vilenjača svečano obilježen početak izgradnje nove džamije u ovom najmlađem džematu MIZ Cazin. I pored visokih temperatura svečanosti je prisustvovao veliki broj građana sa područja općine Cazin i susjednih općina USK-a, kao i veliki broj zvaničnika i predstavnika vlasti i institucija IZ.

Riječ je o 26 džamiji koja se poslije rata gradi na području MIZ Cazin. Vrijednost projekta prelazi 450.000,00 KM, a u radove je do sada uloženo cca 150.000,00 KM. O sveukupnoj društvenoj, duhovnoj i materijalnoj vrijednosti ovakvih projekata govorili su Hakija Halkić, ispred domaćina, zatim muftija bihački Hasan ef. Makić, prof. Fuad Sedić i glavni imam MIZ Cazin Said ef. Mujakić.



Na svečanostima poput ove, svakako je neizostavno i prisustvo prvog čovjeka naše općine, s obzirom da Općina uvijek podržava realizaciju ovakvih i sličnih projekata. Čestitao je mještanima na ovoj inicijativi i stavio se na raspolaganje za dodatnu vrstu pomoći. „Uvijek smo pomagali projekte IZ i nastojaćemo to činiti i dalje“, pojasnio je načelnik Ogrješević.

U ime Reis-ul-uleme dr. Mustafe Cerića prisutnima se obratio njegov izaslanik Nezir ef. Halilović-Muderis. Prema njegovim riječima, objekat džamije se gradi s ljubavlju, ali i u okviru mogućnosti mješтана i doprinosa koji daju drugi.

Program su upotpunili članovi hora MIZ Cazin, koji su ovom prilikom izveli nekoliko ilahija.

Dva nova projekta u MZ Ostrožac

Dana 24.09.2012. godine načelnik općine Cazin posjetio je MZ Ostrožac, tačnije Đuzelić brdo, gdje je izvršena rekonstrukcija potpornog zida mezarluka „Šehiti“, koji se nalazio pred urušavanjem i time ugrožavao sigurnost samih prolaznika. U rekonstrukciju istog je uloženo oko 10.000,00 KM, a radove je izvodila lokalna firma. Nakon toga, načelnik je u pratnji svojih saradnika posjetio put u izgradnji zvani „At-Mejdan“, također u MZ Ostrožac. Radi se o projektu u koji će biti investirano preko 35.000,00 KM.



Put u izgradnji



Potporni zid



„Ovdje se radi o dva odvojena projekta, jednako vrijedna i bitna za svakodnevni život mješтана MZ Ostrožac. Na stanovištu sam da je infrastruktura osnova za normalan život u primarnom obliku, a onda i pretpostavka za razvijanje biznisa i stvaranje novih radnih mjesta. Naš je cilj uvijek bio ulagati u infrastrukturu i to ćemo raditi i u narednom periodu. Ovakvi i slični projekti su dobre pretpostavke za naše buduće planove i projekte na terenu“,

riječ su načelnika Ogrješevića.



Svečano otvoren novi put u MZ Krivaja

MZ Krivaja ove godine je dobila još jedan novi putni pravac. Otvorili su ga mještani zajedno sa načelnikom općine, kao što je to slučaj sa svim preostalim projektima u koje zajedno ulažu i koje zajednički implementiraju. U projekat čija je dužina 902 m uloženo je 60.000,00 KM sredstava kantonalne Direkcije za ceste, 56.000,00 KM sredstava koja su prikupili mještani i 75.000,00 KM koje je uložila Općina Cazin putem Komunalno-stambenog fonda.

Načelnik je i ovoga puta čestitao mještanima na nesebičnom trudu, izdvajanjima i zajedništvu koje su pokazali u realizaciji ovog projekta, jer se radi o specifičnom putnom pravcu kroz dijelove šume koja nije naseljena. „Važnost ovog puta ogleda se u njegovom povezivanju dva velika mjesta, Krivaje i Tržca. Važno je i da se time postigne bolja i brža putna komunikacija, što će povezati naše MZ i naša naselja sa središtem grada, kao i sa drugim općinama“, rekao je načelnik Ogrješević.

Član Građevinskog odbora Nezir ef. Hodžić i predsjednik MZ Ferid Lulić ističu dobrovoljnu stranu projekta i priloga koje su mještani ulagali. Pojasnili su da se ovim putem svakako brže dolazi do nekoliko graničnih prelaza i da je mnogo sigurnije putovati ovim područjem budući da je potpuno nenaseljeno.



Svečano otvoren Suljin put u MZ Pećigrad

U naselju Mujakići, koje pripada MZ Pećigrad, malom svečanošću obilježen je završetak jednog putnog pravca tzv. Suljin put, kao znak sjećanja na njihovog mještanina. Po svom obimu ne velik projekat, ali kako reče Hasan Mujakić, značajan projekat za mještane tog područja, realiziran je u tri faze. Ukupna dužina puta je oko 250 m, vrijednost cca 30.000,00 KM, sa učešćem Općine Cazin u iznosu od nepunih 6.000,00 KM.

Općinski načelnik Nermin Ogrješević je dijeleći



radost sa okupljenim mještanima naglasio: *“Ovo naselje definitivno ima dobro zaokruženu putnu infrastrukturu i rekao bih stvorene uslove za jedno normalno funkcionisanje što nam je ustvari i bio cilj kad smo počeli sa izgradnjom infrastrukturnih projekata na području općine Cazin. Danas možemo konstatirati da smo u tom cilju uspjeli i da smo zaokružili onu osnovnu infrastrukturu i stvorili jedan standard koji vrijedi za sve naše sugrađane u svim dijelovima naše općine. Te ideje se nećemo odreći ni u budućnosti, jer se pokazala vrlo uspješnom i danas isplativom.”*

Nakon svečanog presjecanja vrpce nastavljeno je zajedničko druženje mještana i gostiju u vedroj atmosferi.



Novih 1100m puta u naselju Puškari

U nedjelju, 18. septembra 2012. godine, na svečanosti otvorenja novoasfaltiranog puta u naselju Puškari, koje pripada MZ Cazin, okupio se veliki broj mještana i građana iz susjednih MZ. Put je svečanim presijecanjem vrpce otvorio prvi čovjek naše općine, načelnik Ogrješević, Muharem Ponjević kao najveći aktivista u akciji izgradnje ovog puta i najstariji mještalin Husein Ljubijankić.

O značaju i vrijednosti ovog puta čija dužina iznosi oko 1.100 m govorio je predsjednik Savjeta MZ Cazin Hamdija Ljubijankić i predsjednik građevinskog odbora Mehmed Murić. Naglasili su da vrijedost projekta iznosi 250.000,00 KM i da se saradnja Općine i mještana ponovo pokazala uspješnom kroz realizaciju infrastrukturnih projekata na terenu.

Prema riječima načelnika Ogrješevića, čovjeka čija je ideja bila stvoriti partnerstvo između građana

i organa uprave, ovakvi projekti su od suštinske važnosti za unapređenje cjelokupne društveno-ekonomske situacije u našoj općini. „Realizacijom putne infrastrukture dobićemo bolju povezanost općine i njenih naselja, što će igrati značajnu ulogu u budućim projektima poput poslovne zone, kanalizacione mreže i sl. Ovakvi projekti su nama zaista isplativi, planski su i nastavice ih raditi i dalje“, rekao je načelnik općine Cazin i uputio čestitke mještanima na slozi i zajedništvu koju pokazuju u ovim vremenima.

Nakon svečanog dijela, upriličeno je druženje mještana sa načelnikom i njegovim saradnicima. Razgovarali su o novim inicijativama, projektima i unapređenju cjelokupnog životnog standarda građana općine Cazin.



Novih 550 m puta u MZ Pećigrad

Početak oktobra u našoj općini obilježen je završetkom nekoliko značajnih projekata i aktivnosti. Jedna od njih jeste i novi putni pravac Čatići-Škrgići, u MZ Pećigrad. Vrijednost projekta iznosi 120.000,00 KM, od čega je 50.000,00 KM stiglo putem sredstava od GSM licence, 50.000,00 KM su skupili mještani, a 20.000,00 KM je učešće Općine. Dužina ovog puta iznosi 1.460 m, a u prvoj fazi urađeno je 550 m. Cjelokupnu papirologiju, projektnu dokumentaciju i ostale preduslove administrativne prirode, završila je JU „Kumunalno-stambeni fond“ Cazin.

Predsjednik građevinskog odbora, Ale Škrgić, nije krio zadovoljstvo zbog završetka ovog puta. *„Nadam se da ćemo iduće godine završiti i preostali dio ovog projekta. Naša volja nije upitna, a vjerujemo da neće izostati ni podrška Općine“*, rekao je gospodin Škrgić.

Put je svečano otvorio načelnik općine Nermin Ogrješević, čija je vizija potaknula ovaj pristup saradnje sa građanima i zajedničke realizacije projekata kroz kandidiranje prioriteta od strane samih građana. „Naš cilj je bio da infrastrukturno uredimo sva naša naselja i da pokušamo ujednačiti standarde i uslove života na svim dijelovima teritorije naše općine. U



velikoj mjeri smo u tome uspjeli, naravno u saradnji sa građanima. Ako uzmemo u obzir da će nova infrastruktura omogućiti pretpostavke daljeg razvoja, onda možemo biti posebno zadovoljni, jer ostvarujemo višestruke efekte. Do sada smo napravili više od 200 km ovakvih puteva, završili vodosnabdijevanje, gradili mnogobrojne školske i sportske objekte i igrališta... Zajedno ćemo to raditi i u budućnosti“, riječi su načelnika Ogrješevića koje je uputio mještanima MZ Pećigrad.



Naselje Porčiči u MZ Skokovi dobilo novi put

Prvi vikend u mjesecu oktobru je za stanovnike naselja Porčiči u MZ Skokovi značio krunisanje i završetak značajnog infrastrukturnog projekta. Naime svečanim presijecanjem vrpce pušten je na upotrebu putni pravac u dužini od 240 m, koji je po



Obilazak puta

Presijecanje vrpce



mного čemu specifičan. S obzirom da se radi o samo šest domaćinstava utoliko je projekat značajniji, jer pokazuje upornost građana, ali i osjećaj lokalne vlasti da prepozna i podrži ovakve inicijative i projekte.

Prema riječima predsjednika građevinskog odbora Đulage Porčića bez podrške općine ovaj projekat ne bi mogao biti završen i pored činjenice da je samo šest domaćinstava uložilo oko 26.000,00 KM.

„Mi smo zaista veliku pažnju posvetili infrastrukturi u našoj općini, jer smo željeli da u svim našim mjesnim zajednicama ujednačimo standard i obezbjedimo one osnovne infrastrukturne sadržaje neophodne za normalan život i razvoj tih sredina. Naravno, težnja svakog našeg građanina i svakog našeg naselja jeste da ima riješenu, između ostalog, i putnu infrastrukturu. Naša ambicija jeste da nastavimo sa infrastrukturnom izgradnjom i da podržimo inicijativu svakog našeg građanina. Mi smo raspoloženi da se stavimo na raspolaganje jer smatramo da svaki naš građanin zaslužuje jednake uslove življenja bez obzira u kojem dijelu općine živi“, rekao je načelnik Ogršević.

Nova fontana na centralnom gradskom trgu

U nedjelju, 01. oktobra 2012. godine zvanično je puštena u funkciju nova fontana na centralnom trgu ispred zgrade općinskog načelnika. Projekat je dio cjelokupne rekonstrukcije Trga Alije Izetbegovića, a vrijedan je 82.000,00 KM. Radovi su završeni u predviđenom roku, a izvodila ih je građevinska firma DOLA d.o.o. iz Cazina.

Prema reakcijama prvih prolaznika, Cazin je sada bogatiji za jedan urbanizirani detalj koji će sigurno mamiti poglede i građana i drugih prolaznika. Vjerujemo da će se građani općine Cazin prema ovom projektu odnositi prijateljski, u duhu dobrog građanskog ponašanja.

„Želja nam je urediti gradski prostor po mjeri svakog našeg stanovnika i učiniti ga prepoznatljivim svugdje u okruženju. Protekli period smo se istinski trudili da realiziramo što veći broj projekata, posebno onih koje su građani kandidirali kao važne. Ti principi su nam ključni i držaćemo ih se i u narednom periodu“,

riječ su načelnika općine u povodu realizacije projekta nove fontane na centralnom trgu naše općine.



„Cazinski sajam“ prvog dana okupio brojne goste

U subotu, 15. septembra u Cazinu je u okviru Kantonalne izložbe stočarstva „Cazinski sajam 2012“ na Trgu zlatnih ljiljana održan program prvog dana ove tradicionalne manifestacije. Pored cjelodnevnog izložbe kućnih ljubimaca, posjetioci su imali priliku da pogledaju i kupe dio ponude poljoprivrednih i pčelarskih proizvoda.

Na samom početku u ime organizacionog odbora prisutnima je dobrodošlicu uputio predsjednik organizacionog odbora Hamdija Ljubijankić, nakon čega su im se obratili Ministar poljoprivrede, vodoprivrede i šumarstva u Vladi USK-a Amir Džajić i općinski načelnik Nermin Ogršević.

„Ovaj kraj je poznat po poljoprivredi i zbog toga organizujemo sajam, nadajući se da će poprimiti i regionalni karakter. Smatramo da je poljoprivreda velika šansa za čitav naš kraj, ali i za općinu Cazin. Imamo zvaničan registar uspostavljen u F BiH i po tom registru u općini Cazin imamo preko tri hiljade poljoprivrednih proizvođača, što pokazuje da smo prvi u F BiH zbog čega toj proizvodnji trebamo posvetiti najveću moguću pažnju. Svaki put kad govorimo o tome kažemo da smo duboko zainteresirani da i Federacija i Kanton posvete takvu pažnju našim poljoprivrednim proizvođačima. Mi smo jedina općina u Kantonu, a vjerovatno i u Federaciji, koja daje poticaje svim poljoprivrednim proizvođačima. Svake godine uložimo preko 400 hiljada, a ove godine smo izdvojili preko 560.000,00 KM. Nama je vrlo važno da se i na višim nivoima uspostavi jedan ustaljen sistem poticaja, a ne da se iz godine u godinu uslovi mijenjaju pa da naši poljoprivredni proizvođači ne znaju na vrijeme da li će biti poticaja i u šta će tačno biti usmjereni“, rekao je načelnik Ogršević obraćajući se svojim građanima.

U okviru edukativnog programa sajama svake godine se održavaju predavanja u oblasti poljoprivrede i stočarstva što nije izostalo ni ovaj put. O aktuelnoj problematici u oblasti stočarstva govorio je dr. vet. med. Aladin Sabljaković, nakon čijeg predavanja se otvorila interaktivna rasprava sa prisutnim poljoprivrednicima. O temi poticaja u poljoprivredi govorio je dipl. ing. poljop. Davor Šimić. Zaključeno je da su u budućem periodu neophodna kontinuirana predavanja u ovim oblastima.



Prvi dan sajma završen je revijalnom izložbom pasa, koja je uz izložbu kućnih ljubimaca najviše obradovala veliki broj mališana u našem gradu. Rezultatima posjete i prodaje izloženih proizvoda zadovoljni su bili i organizatori i sami učesnici. Posebno su zanimljivi bili izlagači kućnih radinosti Udruženja „Behar“ i „Đerđef“, a da atmosfera bude upotpunjena na naš tradicionalni način pobrinuli su se i članovi KUD „Bajro Redžić“ sa dvije nove koreografije, koje su oduševile posjetiocyte sajma.



Sumirani rezultati drugog dana „Cazinskog sajma“

Drugog dana XII Kantonalne izložbe stočarstva „Cazinski sajam 2012“ na programu je bila izložba na lokalitetu stočne pijace u Slatini. Na samom početku prisutnima su se obratili kantonalni ministar poljoprivrede, vodoprivrede i šumarstva Amir Džajić, koji je naglasio da ovaj kraj i poljoprivreda imaju potencijal, kojeg treba razvijati i da, između ostalog, treba sve učiniti da se i ova izložba podigne na višu razinu u cilju promocije domaćeg proizvoda i podrške našim proizvođačima.



Općinski načelnik Nermin Ogršević u svom obraćanju je između ostalog naglasio:

„U narednom periodu posebnu pažnju ćemo posvetiti pokretanju prerade poljoprivrednih proizvoda na području naše općine, jer znamo kakvi su problemi sa otkupnim cijenama i moramo naći one koji će biti zainteresirani da pokrenu prerađivački proces. Na nivou općine pokušavamo kroz sredstva koja ulažemo biti od pomoći i zainteresirani smo da tu bude i više, a očekujemo da ćemo sa Kantom imati sinergiju i zajednički nastup kako bi bilo više koristi za naše poljoprivredne proizvođače.“

Lijepo vrijeme je išlo na ruku i organizatoru i učesnicima izložbe i uzimajući u obzir realne probleme u svakodnevici naših poljoprivrednika, možemo reći da je odaziv izlagača bio na zadovoljavajućem nivou, u pojedinim kategorijama i više od prošlih godina. Sa druge strane posjeta je daleko nadmašila prošle sajmove, o čemu su svjedočili i prepuni okolni parkinzi.

Kada je u pitanju takmičarski dio, stručne komisije za ocjenjivanje su radile u dva tima, kako bi se skratio boravak stoke na pijaci.

Nakon pregleda, ocjenjivanja i sumiranja rezultata pobjednici po kategorijama su slijedeći:

- Kategorija krave muzare:

1. Grlo redni broj 45 vlasnika Duraković Firzeta – Toromani/Cazin - 1000,00 KM
2. Grlo redni broj 31 vlasnika Malić Fikreta - Stijena/Cazin - 700,00 KM
3. Grlo redni broj 111 vlasnika Civić Amira – G.Koprivna/Cazin – 500, 00 KM

- Kategorija visoko steone junice:

1. Grlo redni broj 17 vlasnika Semanić Zuhdije – Semanići/Cazin - 1000,00 KM
2. Grlo redni broj 201 vlasnika Nukić Hilmije – Turija/Bihać - 800,00 KM
3. Grlo redni broj 5 vlasnika Hadžalić Smajila – Slatina/Cazin - 500,00 KM

- Kategorija bikovi:

1. Grlo redni broj 6 vlasnika Bajrić Teufika – Bajrići/Cazin - 800,00 KM
2. Grlo redni broj 4 vlasnika Begić Mirsada – Miostrah/Cazin - 500,00 KM
3. Grlo redni broj 3 vlasnika Semanić Alage – Semanići/Cazin - 400,00 KM

- Kategorija konji:

1. Grlo redni broj 9 vlasnika Lipovača Smaila – Ripač/Bihać- 500,00 KM
2. Grlo redni broj 131 vlasnika Agičić Elvedina – Orašac/Bihać- 300,00 KM
3. Grlo redni broj 127 vlasnika Čaušević Hasana – G.Barska/Cazin- 200,00 KM

- Kategorija ovaca:

1. Grlo redni broj 4 vlasnika Burzić Amira – Bosanska Krupa - 500,00 KM
2. Grlo redni broj 1 vlasnika Omanović Senada – Gnjilavac/Cazin - 300,00 KM
3. Grlo redni broj 7 vlasnika Žunić Mujage – Brezova Kosa/Cazin- 200,00 KM

Općina Cazin pokrenula proces izrade Strategije za mlade

Prema Zakonu o mladima sve institucije vlasti su obavezne donijeti Strategiju za mlade sa programskim pristupom djelovanja prema mladima, definiranim problemima i potrebama mladih, strateškim pravcima djelovanja, što uključuje i ciljeve strategije kao i mjere za realizaciju postavljenih ciljeva. U ovaj proces Općina Cazin je krenula kroz partnerski odnos sa Vijećem mladih općine Cazin, jer su oni najpozvaniji da se uključe u izradu strateških dokumenata koji se tiču njihovog položaja u našoj zajednici.

Obuka anketara



Svoj aktivizam i opredjeljenost za promjene Vijeće mladih je pokazalo apliciranjem na Javni poziv za sredstva koja će se implementirati u svrhu izrade ove Strategije. Donator ovih sredstava je Vlada Italije, a implementira ih Svjetska banka u BiH.

U okviru ovog projekta Općina Cazin i Vijeće mladih su već realizirali niz značajnih aktivnosti i programskih zadataka. Prvobitno je održan okrugli sto

Učesnici okruglog stola



na temu „Pokažimo odgovornost prema mladima“ u kome je učešće uzeo veliki broj mladih iz nevladinog sektora, kao i kandidata na predstojećim lokalnim izborima, što ulijeva nadu u veće zalaganje za promjenu statusa mladih u društvu i njihov cjelokupan razvoj prema pozitivnim promjenama. Na ovom okruglom stolu održana je prezentacija o svim detaljima vezanim za proces izrade Strategije za mlade. Oni su ovim putem pozvani i na veći aktivizam, jer se samo na taj način mogu informisati o svojim pravima, obavezama, mogućnostima za prakticiranje i primjenu svojih ideja i sl.

Druga, a posebno važna aktivnost, odnosila se na edukaciju anketara po unaprijed utvrđenoj metodologiji rada na ovom projektu. Obuku je vodila Belma Gijo, iz Instituta za razvoj mladih KULT Sarajevo, koja je na ovom projektu angažovana kao konsultant. Definisan je reprezentativan uzorak od 300 anketiranih mladih ljudi u svim MZ naše općine. Iako je anketni upitnik dosta zahtjevan i sadrži 197 pitanja iz raznih oblasti omladinske politike, svi su već uvidjeli važnost ovakvog istraživanja koje treba dovesti do kvalitetnog strateškog dokumenta prema mladima. Potom je uslijedilo upoznavanje javnosti sa rezultatima anketiranja i imenovana su radna tijela koja će učestvovati u izradi Akcionog plana, kako bi se definisali strateški pravci djelovanja, projekti, odgovorne osobe, vrijeme potrebno za implementaciju planiranih aktivnosti i naravno budžet. Potpisan je i Memorandum o saradnji između Vijeća mladih i ključnih institucija koji će direktno ili putem svojih predstavnika učestvovati u procesu izrade ovog važnog strateškog dokumenta.

Servis 48 h u službi građana

Nakon što je 31.05.2012. godine pušten u rad Servis 48 h, napravili smo analizu rezultata njegovog funkcionisanja koju Vam donosimo u nastavku.

Do sada je putem dostupnih formi postavljanja pitanja primljeno njih oko 80. Najveći broj upita od strane građana odnosio se na probleme u vezi sa kanalizacijom, putevima, vodovodom i psima lualicama. To su uglavnom i pitanja vezana za komunalne probleme što i spada u domen Servisa 48 h. Zabilježeno je i nekoliko pitanja koja nisu u domenu ovog servisa, ali je na iste uredno i pravovremeno odgovoreno upućivanjem na nadležne službe za pitanja koja su u njihovom opisu djelovanja. Svaki postavljeni

upit riješen je u roku manjem od 48 h, čime se potvrđuje visok stepen funkcionalnosti ovog komunikacijskog kanala Općine Cazin sa njenim građanima.

Napominjemo da svakog ponedjeljka od 09:30 do 10:00 sati na radiju Cazin ide emisija pod nazivom „Servis 48 h“ čime je ova usluga dostupnija većem broju građana. Ujedno pozivamo sve naše sugrađane da koriste dostupne usluge organa uprave i prijave postojeći problem u svojoj sredini ili postave pitanje za koje trebaju tačnu informaciju ili upustvo na nadležnu službu.

Važno je znati da Servis 48 h nema ulogu rješavanja problema, već je njegova svrha da dostavi povratnu informaciju u roku od 48 h. Više o ovom servisu možete saznati na web stranici Općine, gdje možete pronaći i upustvo za korištenje istog.

Zabilježeno 100 000 posjeta na web stranici općine Cazin

Općina Cazin je 24.08.2010. godine pustila u rad novu web stranicu sa domenom www.opcinacazin.ba. U subotu, 08.09.2012. godine, zabilježeno je 100.000 posjeta što ukazuje na visok broj posjeta jedne službene stranice. Prema podacima google page rank-a naša web stranica ima ocjenu 4, što se, u odnosu na mnoge komercijalne stranice koje imaju daleko veći broj posjeta, a dosta manju rang ocjenu, smatra vrlo uspješnim.

O kvaliteti, preglednosti, ažuriranosti i inovativnosti službene stranice Općine Cazin stigle su i brojne pohvale naših međunarodnih ali i domaćih partnera, sa kojima ovaj organ uprave ima dugogodišnju saradnju.

Važno je napomenuti da velika većina lokalnih i kantonalnih portala preuzima vijesti sa ove web stranice i time potvrđuje aktuelnost i važnost tema koje objavljujemo.

Do sada je www.opcinacazin.ba pretrpjela niz značajnih unapređenja, koja su pojednostavila i približila sadržaj korisnicima. Tako je pokrenut Poslovni imenik za sva pravna lica sa područja općine Cazin kako bi se kreirala jedinstvena baza podataka privrednih i drugih subjekata sa osnovnim kontaktnim informacijama. Nastavljeno je sa objavom službenog info biltena koji je građanima dostupan i u elektronskoj verziji. Objavljujemo i sve oglase, najave, obavijesti i sl. čime potičemo širu javnost na uključivanje u razne procese i činimo rad Općine u mnogome transparentnijim. Istovremeno smo omogućili najveći broj zahtjeva dostupnim putem web-a, a pokrenuli smo i „Servis 48 sati“, koji ima za cilj pružiti povratnu informaciju korisnicima u roku od 48 h iz oblasti



komunalnih usluga. Nadogradnja pojedinih sekcija, banneri i menija vrši se periodično i time se obogaćuju službeni sadržaji stranice. Na istom sajtu moguće je pronaći i niz strateških dokumenata, odluka, nacrti koji su u pripremi za donošenje, kao i službene novine koje izdaje Općina Cazin.

WebStatsDomain (<http://www.webstatsdomain.com/domains/www.opcinacazin.ba/>) je rangirao stranicu kao 1,737,916 među 30 miliona stranica, sa 32 backlinka i 21% seo rezultatom. I što je najvažnije za korisnike stranica je od WebStatsDSomain-a ocijenjena kao bezbjedna za korisnike, neopterećena bilo kakvim zlonamjernim softwareom, tako da svi korisnici – posjetioci mogu bezbrižno pretraživati sadržaj bez bojazni da će svoj računar inficirati virusima. Radimo na ubrzanju samog otvaranja portala, obzirom na „težinu“ index stranice i brzinu servera. Nadamo se u budućnosti još boljim i potpunijim sadržajima. Ostanite uz nas i javite nam Vaše dojmove i prijedloge na mail press@opcinacazin.ba

Očišćeno 50 m³ otpada u akciji „Let's do it“

U nedjelju, 09.09.2012. godine, u Cazinu je uspješno obavljena akcija "Let's Do It - Očistimo Cazin 2012", a u okviru globalne svjetske akcije "Let's Do It World 2012" odnosno, akcije koja u Bosni i Hercegovini nosi naziv „Let's Do It - očistimo zemlju za 1 dan“. Akcija je organizovana od strane Općine Cazin, uz podršku JKP Čistoća Cazin i Mjesne zajednice Cazin, a aktivno učešće su uzeli predstavnici Vijeća mladih općine Cazin, Planinarskog društva „Krajina“ Cazin, Lovačkog društva „Jelen“ Cazin i Općinske organizacije Crvenog križa Cazin, učenici i zaposlenici Osnovne škole u Gornjoj Koprivni i drugi građani/volonteri. U akciji je ukupno učestvovalo sto volontera, među kojima najviše mladih, što je i posebna vrijednost ove akcije.



USK Sinha Kurbegović sa saradnicima, kao i Ministar za pitanja boraca i RVI Mirsad Topčagić. Prema riječima načelnika Ogrješevića građani općine Cazin su dosta aktivni, rado se uključuju u akcije čišćenja svog okoliša, što je za svaku pohvalu. „Uvijek težimo višem pa ćemo se truditi da u budućnosti animiramo više ljudi. Pozitivno je što danas ovu akciju realiziraju u najvećem broju mladi ljudi, zbog čega možemo reći da imamo sposobne i osvještene građane koji će uspješno upravljati razvojem Cazina.

Nadamo se da će ova uspješna akcija biti povod za mnogo sličnih inicijativa, koje će za rezultat imati čistiji okoliš u našoj sredini



Ispred Kantonalnog ministarstva građenja, prostornog uređenja i zaštite okoliša USK Bihać, akciju su pratili Vildana Zulić i Arijeta Cavdarbaša Bošnjak.

Lokacije na kojima su se odvijali radovi su: padina kod nacionalnog spomenika „Kuća Nurije Pozderca“, park kod nacionalnog spomenika Stari grad Cazin, prostor Sportsko-rekreacionog centra Alinac, ulica Nurije Pozderca, dvorišta Osnovnih škola Cazin I i Cazin II, Srednjoškolskog centra „Ibrahim Perviz“ i prostor oko osnovne škole u Gornjoj Koprivni.

Ukupno je prikupljeno i odveženo 50 m³, odnosno oko 17 tona otpada, što predstavlja značajnu količinu otpada.

Akcija je završena druženjem učesnika uz grah iz kazana, ispred Kulturnog centra Cazin. Učesnike su posjetili i općinski načelnik Ogrješević Nermin, Ministrica za građenje

Odgajatelji sa Biroa rada angažirani u projektu Općine Cazin i UNICEF-a

U prostorijama kabineta općinskog načelnika upriličena je svečanost potpisivanja Ugovora sa 13 odgajatelja angažiranih sa Biroa rada Cazin za učešće u projektu „I ja sam dijete i ja imam pravo na igru i druženje“. Projekat je namijenjen djeci uzrasta od 3 do 6 godina i ima za cilj povećati stepen učešća djece u predškolskom odgoju i obrazovanju na području općine Cazin. Finansijski ga je podržao UNICEF BiH, a partneri u projektu su Općina Cazin, JU Dječije obdanište „Hasnija Omanović“ Cazin, Udruženje djece sa posebnim potrebama „I naša djeca su djeca“ i osnovne škole na teritoriji naše općine. Dodatna vrijednost projekta jeste angažman nezaposlenih lica sa Biroa koji će steći određeno radno iskustvo i ostvariti materijalnu naknadu za svoj rad.

„Važno je da u ovakve i slične projekte uključujemo sve veći broj aktera iz društvenog života, omogućujemo svima jednake šanse i stvaramo sredinu na koju svi možemo biti posnosni“, riječi su načelnika Ogrješevića. „Ujedno svima čestitam Dan učitelja i želim Vam mnogo sreće u životu i radu“, dodao je načelnik.

Prema riječima Samardžić Zehrudine, jedne od odgajateljica uključenih u projekat, postoje realne šanse da se ovakve aktivnosti nastave i u buduću i da se stvara obaveza brige u svakom djetetu u općini Cazin. „Iako je projekat počeo prije 2 sedmice, već pokazuje zavidne rezultate na radost svih učesnika“, rekla je Zehrudina u izjavi za medije.



Potpisivanje ugovora

Načelnik sa odgajateljicama



IV Bili smo...

Tradicionalna predbajramska posjeta Centru Duga

Već dugi niz godina općinski načelnik Nermin Ogršević i Udruženje „Srce Cazina“ posjećuju, pred bajramske praznike, Centar za djecu bez roditeljskog staranja „Duga“ u Kulen Vakufu. Svrha njihove posjete svake godine, pa i ove, jeste doniranje materijalnih sredstava kako bi ovaj Centar nesmetano zadovoljavalo osnovne potrebe njenih štićenika. Ove godine tradicionalnoj akciji pridružili su se, MIZ Cazin, Džemat Suljući te brojni privrednici sa prostora općine Cazin, koji su obezbijedili veće količine pelena za sve uzraste štićenika doma, odjeću i ostale potrebštine za ovaj Centar.

U posjeti Centru pored općinskog načelnika bili su još i glavni imam općine Cazin Said ef. Mujakić, predstavnici Udruženja „Srce Cazina“ Šerif Kaljković i Adisa Muhamedagić, te Sabahudin ef. Begić ispred Džemata Suljući.

U svom obraćanju medijima načelnik Ogršević je istaknuo slijedeće:

„Budući da smo ovu aktivnost odredili kao tradicionalnu, dužnost nam je, a i iskrena želja, da obradujemo djecu u Centru „Duga“ nekim poklonima i potrebštinama, kako bi predstojeće bajramske praznike dočekali jednako kao i sva druga djeca. Ovom akcijom mi zapravo pokazujemo da nastojimo biti od koristi, da želimo pokazati humanu stranu našeg posla. Ujedno, želimo kod građana pobuditi osjećaj solidarnosti i suosjećanja, kako bi i oni dali svoj doprinos boljem životu ovih mališana. Uposlenici Centra zaista rade nadjudskim naporima kako bi ovoj djeci omogućili normalno djetinjstvo i zbog toga smo u obavezi da pomognemo onoliko koliko možemo. Sve je to u svrhu naše budućnosti, odnosno naše djece“.

Kao osnivači i realizatori ove akcije, predstavnici Udruženja Srce Cazina ističu da je ova priča sa Centrom „Duga“ zapravo prijateljska priča koja traje već 5 godina zaredom. „Pokrenuli smo ovu akciju zajedno sa Općinom Cazin, a iz godine u godinu nam pristižu novi donatori i novi prijatelji Centra. Od samog početka smo željeli da ova pomoć ima onu najtopliju ljudsku notu i zbog toga smo svim srcem uz djecu koja borave u ovom Centru. Važno je napomenuti da smo za svako dijete odabrali poklon osobno, kako bi odgovarao njegovom uzrastu i željama. Trudili smo se da im se to sve sviđa i da ovaj Bajram i djeca u Centru dočekaju u novoj odjeći kao i sva druga naša djeca“, riječi su Adise Muhamedagić, predsjednice Udruženja „Srca Cazina“.

Akciji za djecu u ovom Centru pridružuje se i MIZ Cazin na čelu sa glavnim imamom Saidom ef. Mujakićem. On je iskoristio priliku i pozvao sve vladine i nevladine institucije da se uključe u ovu akciju i pomognu mališanima, kako u Ramazanu, tako i van njega.



Promocija knjige generala Fadila Hasanagića

U subotu 20.10.2012. godine u Kulturnom centru u Cazinu održana je promocija knjige autora generala Fadila Hasanagića pod nazivom „Unsko-sansko područje u odbrani i očuvanju državnosti Bosne i Hercegovine“. Promocija je okupila veliki broj građana općine Cazin, čime se potvrdio veliki interes za pisanu riječ o dešavanjima iz proteklog rata.

U uvodnom dijelu, u ulozi domaćina promocije, obratio se gospodin Nermin Ogršević načelnik općine Cazin, koji je izrazio zadovoljstvo što je u vrijeme aktuelnog obilježavanja 20-te godišnjice Petog korpusa Armije Bosne i Hercegovine općina Cazin imala priliku za organizaciju promocije ovakvog djela. „Značaj stvaranja ovakvih pisanih djela leži u potrebi da se obnove naša sjećanja, da mlađim generacijama pružimo priliku da se upoznaju sa činjenicama iz naše, ne tako davne, odbrambeno-oslobodilačke ratne prošlosti“, istaknuo je načelnik Ogršević.



Promotori knjige bili su: profesor Nijazija Maslak, dr.sc. Mujo Begić i general Atif Dudaković.

Profesor Maslak je ukratko predstavio strukturu ovog dijela koja je prezentirana kroz četiri poglavlja: Historija BiH i unsko-sanskog područja, BiH i unsko-sansko područje u političkim i vojnim planovima agresora u ratu 1992.-1995. godine, rat u Bosni i Hercegovini i posljednje poglavlje rat na unsko-sanskom području.

„Ova knjiga na dokumentiran način govori o dešavanjima na prostoru Bosne i Hercegovine i unsko-sanskog područja u periodu od 1992.-1995. godine. Svojim sadržajem, historijskim okvirom i specifičnostima koje su sastavni dio ove knjige autor analizira i definira velik broj događaja iz pomenutog perioda. Ova knjiga je

kontinuitet autorovog kazivanja o agresiji na Bosnu i Hercegovinu. General Hasanagić je predhodnim knjigama opisujući rat u Bosni i Hercegovini otvorio put saznavanju istine o ratu u Bosni i Hercegovini“, rekao je u svom obraćanju publici dr.sc. Mujo Begić.



Kao treći promotor knjige obratio se i general Atif Dudaković. Prema njegovim riječima Cazin ovakve manifestacije organizira srčano, sa iskrenim pristupom i namjerom. „Ovdje smo kako bi evocirali uspomene na događaje iz proteklog rata, a kao direktni učesnici najpozvaniji smo da podsjećamo na iste“, riječi su generala Dudakovića. „Generalu Hasanagiću čestitam na izboru teme knjige, koja je poprilično izazovna i teška za pisanje“, dodao je general Dudaković.

Na samom kraju obratio se i autor prezentiranog djela, general Fadil Hasanagić, koji se zahvalio domaćinu promocije i promotorima, te svima prisutnim koji su izdvojili vrijeme za ovaj događaj.



Otpočela kulturna i turistička saradnja Cazina i Šilea



U periodu od 13.-15. 7. 2012. godine održan je festival Šile Bezi u našoj prijateljskoj općini Šile, jednoj od Istanbulskih općina. Festival Šile Bezi pokrenut je još prije 26 godina, a ovo je drugi put da ima internacionalne razmjere, jer je okupio umjetnike i zanatlije iz više zemalja svijeta kao što su: Ukrajina, Bjelorusija, Japan, Kina, Meksiko, Njemačka, Australija, Tunis, Alžir, Bugarska i Bosna i Hercegovina. Našu zemlju su ponosno predstavljali umjetnici Sead i Halida Emrić u pratnji direktora Agencije za razvoj Cazina (ARC) Amira Mulalića.

Bila je ovo prilika da se predstave neke tehnike kojima se bave umjetnici u BiH, a kako se Emrići bave umjetnošću koja je prožeta historijom BiH, motivima povelja bosanskih kraljeva iz srednjeg vijeka, motivima sa stećaka, motivima iz osmanskih fermana, time je BiH predstavljena u najboljem svijetlu. Ponosni bosanci bili su domaćini mnogim bosancima koji žive u Turskoj. Ljudi iz Australije, Kine, Japana i ostalih zemalja bili su više nego impresionirani pričom o BiH.

Jedna od najstarijih, a ipak najmanjih zemalja od svih predstavljenih stajala je rame uz rame sa velikim svjetskim kulturama. Zadovoljstvo radi kvalitetne prezentacije, te zahvalu za učešće na festivalu, uputio je načelnik općine Šile Can Tabakoğlu na nedjeljnom druženju za odabrane zemlje, među kojima je bila i BiH. Na tom druženju, direktor Mulalić je u kraćem obraćanju rekao da je okupljanje na ovom mjestu sa plemenitim namjerama širenja kulture i upoznavanja različitosti, što ostavlja manje mjesta za zlo u svijetu. Nakon razmijenjenih kontakata, poklona i podijeljenih letaka, delegacije su se vratile svojim kućama ponijevši lijepe uspomene i nadu u ponovni dolazak, a ostavljajući Šile u prelijepom ljetnom ambijentu i moru turista.

Okupljanje nekadašnjih mještana Crnaje

Dana 28.07.2012. godine u naselju Crnaja, MZ Tržačka Raštela, okupili su se mještani pravoslavne vjeroispovjesti koji su ranije živjeli na tom području. Oko trideset lica, koja žive diljem svijeta (od zapadne Evrope do zemalja ex Jugoslavije) upriličilo je druženje na mjesnom pravoslavnom groblju Crnaje gdje je, u prisustvu Vladike bihačko-petrovačkog te svećenika nadležnog za to područje, održana molitva umrlim mještanima.

Skupu je prisustvovao i načelnik općine Cazin Nermin Ogrješević sa saradnicima. Svojim prisustvom izrazio je dobrodošlicu i pokazao da je u općini Cazin svako dobrodošao bez obzira na vjeru i nacionalnost.

U povodu ovog okupljanja, prisutnima je općinski načelnik rekao:

„Ono što je činjenica kada je u pitanju naša općina jeste da smo sigurno među prvima u BiH koja je do 2000. godine izvršila povrat cjelokupne, ili najvećeg dijela imovine, prijeratnim vlasnicima i na takav način direktno pokazala na kakvim temeljima planira graditi svoju budućnost i svoj razvoj. Mi smo otvorena općina u raznim vidovima komunikacije i saradnje pa tako i kad je u pitanju ovaj događaj. Smatrali smo da je sasvim normalno da se pojavimo i na neki način damo lijep gest dobrodošlice onima koji preko 50 godina ne žive u Crnaji, ali tu su rođeni, ili su rođeni njihovi roditelji, a pokazali su interes da posjete rodni kraj.“

Prisutni mještani pravoslavne vjeroispovjesti, koji inače žive u Crnaji, izjavili su da sa svojim sugrađanima Bošnjacima žive u tradicionalno jako dobrim odnosima i da je ovo primjer u cijelom regionu kako treba živjeti u zajedništvu i toleranciji.



„Moj otac je iz Crnaje otišao 1965. godine sa nas sedam članova porodice. Otišao je u Srem, u Srbiju, zbog izuzetno teške situacije koja je ovdje vladala, trebalo je prehraniti i školovati djecu, a ovdje je bilo jako teško. Ja jesam dolazio prije, a zadnji put sam bio 1991. godine. Moram se zahvaliti načelniku općine i našim komšijama koji su nam uvijek izlazili u susret“, riječi su Borivoja Božića.

Iako je ovo okupljanje održano po prvi put, isto je proteklo u miru i duhu prijateljstva uz prisustvo lokalnih mještana bošnjačke nacionalnosti. Nakon molitve i ručka prisutni su obišli svoje domove i imanja u kojima su ranije živjeli.



Velika posjeta štandu



Načelnik radio na kasi

Otvorena poslovница DM-a u Cazinu

Na početku ljetne sezone, praznika i godišnjih odmora u centru Cazina se uveliko radilo. Tako je u nedavno završenom tržnom centru „Ljiljan“, svečano otvorena poslovница DM-a (drogerie markt). Posebno iznenađenje za mnoge bio je načelnik Ogrješević koji je u periodu od jednog sata promotivno radio na kasi i na takav način doprinio realizaciji jedne humane akcije, koja je upriličena ovim povodom. Naime, ovom prilikom je uručena donacija od 2.000,00 KM, koja je po načelnikovo preporuci dodijeljena predstavniku Udruženja djece sa posebnim potrebama „I naša djeca su djeca“. Načelnik Ogrješević je u ovoj svečanoj atmosferi naglasio da je i ovaj kratki rad bio pozitivno iskustvo:

„U svakom slučaju bila je ovo dobra prilika da zaslužimo jednu donaciju koju smo usmjerili za Udruženje „I naša su djeca djeca“. Bio je to dodatni motiv da se odazovem pozivu DM-a i njihovih predstavnika, i da na jedan, rekao bih simpatičan način, zarađimo ovakvu donaciju za naše udruženje.“



Primajući nagradu u ime Udruženja Refik Samardžić je naglasio:

„Ovim putem želim da se zahvalim načelniku kao inicijatoru i našem donatoru, koji su prepoznali rad našeg Udruženja i uručili nam ovu donaciju u iznosu od 2.000,00 KM. Iskoristićemo je za namirnice i higijenski pribor, tako da bi djecu obradovali za predstojeće bajramske praznike.“

Nisu izostale ni pozitivne impresije predstavnika ovog velikog kozmetičkog lanca. „Oduševljeni smo Cazinom i Vašim građanima i nadam se da će i građani prepoznati misiju DM-a, da ćemo zadovoljiti potrebe naših kupaca, da ćemo ostvariti saradnju sa lokalnom zajednicom, posebno u ovim našim društveno odgovornim kampanjama,“ riječi su Adise Huskić, DM voditeljice za našu regiju i sektor ljudskih resursa.



Cazinjani dočekali Bajram na Trgu zlatnih ljiljana

Tradicionalni doček ramazanskog Bajrama 2012. godine u Cazinu ostaće nezaboravan hiljadama cazinjana, koji su se sa područja cijele općine, u rijekama auta slili u centar Cazina, a njima se pridružio i veliki broj gostiju iz susjednih općina. Lijepo i ugodno vrijeme pogodovalo je organizatorima i posjetiocima, tako da su svi zadovoljni otišli svojim kućama. Svečanost se po prvi put održavala na novouređenom Trgu zlatnih ljiljana, što je ujedno bila prilika i za njegovo zvanično otvaranje.

Na samom početku prisutnima su uputili riječi dobrodošlice domaćini manifestacije prof. Said ef. Mujakić, glavni imam MIZ Cazin i Nermin Ogršević, načelnik općine Cazin.

Glavni imam je uputio nekoliko riječi čestitke i objasnio važnost ovih prazničnih dana. „*Bajramska radost koju ispoljavamo sigurno će biti veća ukoliko je podijelimo sa drugim ljudima i zbog toga pozivam sve nas, da u toku bajramskih dana, podijelimo tu radost sa članovima naše porodice, komšijama, rođacima i prijateljima*“, savjetovao je, između ostalog, glavni imam Mujakić.

Emotivne i pozitivne riječi u povodu Ramazanskog bajrama, svojim sugrađanima, uputio je i načelnik Ogršević. Izrazio je veliko zadovoljstvo što se Cazin i središte grada uredilo,

uljepšalo i izgradilo od posljednjeg zajedničkog dočeka Bajrama. Vidno sretan i raspoložen, poželio je Cazinjanima i Cazinjankama svako dobro, u privatnom i poslovnom životu. „*Neka ovaj Bajram, uz svoje blagodati, donese u naša srca smirenost i hajr s kojima ćemo dijeliti među nama dobronamjernost, bratstvo, ljubav i prijateljstvo, a sve suprotno od toga neka ostane iza nas. Želim vam dobro zdravlje, mir i rahatluk u vašim domovima i porodicama i da duh Bajrama zaogrne naše lijepe cazinske avlije, puteve, ulice, sve ono što srcem volimo i svakodnevno izgrađujemo*“, riječi su prvog čovjeka naše općine upućene svim Cazinjanima u domovini i dijaspori.



Burhan Šaban

Da bi raspoloženje bilo na bajramskom nivou potrudili su se gosti u zabavnom dijelu programa. Prvo je nastupio Burhan Šaban, kojemu je ovo drugi nastup pred cazinjanama. Nakon njega nastupila je grupa cazinskih muzičara sa pjesmom „Cazin grade moj“, popularnom himnom Cazina, tokom čijeg izvođenja je općinski načelnik svečano podigao zastavu trgovačko-poslovnog centra Ljiljan. Time je ovo velebno zdanje proglašeno otvorenim.

„*Davno su kazali da slika govori više od hiljadu riječi. Trg zlatnih ljiljana i Poslovno-trgovački centar „Ljiljan“ u Cazinu, sve nam kažu dok ih pogledamo. Posebno sam sretan što je ova slika, kojoj večeras prisustvujemo, samo jedna u bogatom mozaiku novih slika našeg Cazina. Velika mi je čast i zadovoljstvo, kazati večeras ovu jednostavnu i lijepu rečenicu: Dragi Cazinjani, predajem vam na upotrebu novizgrađeni Trg zlatnih ljiljana i proglašavam otvorenim Poslovno-trgovački centar „Ljiljan“. Neka nas u budućnosti služe u dobrom zdravlju, miru i napretku*“

izjavio je načelnik Ogršević u ovom svečanom trenutku.


Usljedio je vatromet, također jedna od tradicija bajramskog okupljanja u Cazinu. U drugom dijelu zabavnog programa nastupio je Cazinjanin Osman Hadžić, kojem se publika pridružila u izvođenju numera.

Bila je ovo najmasovnija svečanost dočeka Bajrama u našoj općini. Želimo svako dobro našim Cazinjanima, gdje god da se nalaze i mnogo zajedničkih svečanosti u vremenima koja dolaze.



Osman Hadžić

Veliki broj okupljenih



Podizanje zastave

Obilježen Dan bez automobila u Cazinu



Okupljanje mališana

U petak, 24. septembra, centralnim trgom u Cazinu prošetali su mališani JU „Dječije obdanište“ noseći zelene balone u znak podrške očuvanju okoliša i zaštiti naše prirode na Dan bez automobila. Nakon toga su svoj izlet završili u JU „Kulturni centar“, gdje su imali priliku gledati crtani film i družiti se sa građanima, uposlenicima organa uprave i Kulturnog centra, a obišao ih je i načelnik Ogršević. Drugog dana obilježavanja Dana bez auta na programu je bila biciklijada u organizaciji Biciklističkog kluba Cazin i Udruženja mladih „Stari grad“ Ostrožac, a pod pokroviteljstvom općinskog načelnika Nermina Ogrševića. Preko dvije stotine prijavljenih učesnika biciklijade

sa područja cijelog USK-a okupili su se na platou ispred zgrade Stare gimnazije. Završna tačka biciklijade bio je Stari grad Ostrožac, gdje su domaćini bili mladi Udruženja Stari grad Ostrožac. Za sve učesnike i prisutne pripremljen je paprikaš. Biciklijadi se pridružio i općinski načelnik Nermin Ogršević, i kao rekreativni biciklista, naglasio nespornu podršku ovakvim i sličnim aktivnostima, koji idu u pravcu promocije biciklizma i zaštite okoliša. Prema riječima predsjednika BKC Samira Japića cilj akcije je promocija zdravog načina života, ukazivanje na potrebu očuvanja okoliša i svakako druženje u svrhu jačanja duha zajedništva u našoj lokalnoj zajednici.



Druženje na Ostrošču



Okupljanje ispred stare Gimnazije

Obilježen Dan MZ Šturlić



Obraćanje načelnika

Obilježavanjem 8. augusta, Dana MZ Šturlić, na neki način se završavaju manifestacije koje se tradicionalno održavaju u okviru obilježavanja Dana općine Cazin.

I pored visokih temperatura i činjenice da je u toku bio mjesec Ramazan, može se reći da je posjeta na ovim manifestacijama bila zadovoljavajuća. Tako se i u MZ Šturlić okupio veliki broj Šturličana, građana sa područja cijele općine, gostiju iz susjednih općina, te zvanica sa općinskog i kantonalnog nivoa i predstavnika IZ.

Na samom početku proučena je fatiha i položeno je cvijeće na spomen obilježja šehidima MZ Šturlić i patriotima BiH.

Dobrodošlicu gostima uputio je Ramiz Bećirević, predsjednik Savjeta MZ Šturlić, nakon kojeg su se prisutnima obratili Haris Ćoralić, predsjedavajući OV-a Cazin, Admir Hadžipašić, predsjedavajući Skupštine USK-a, te ministar za pitanja boraca u Vladi USK-a Mirsad Topčagić.

Čestitku povodom godišnjice oslobođenja uputio je i general Fadil Hasanagić, koji se osvrnuo na ratni put V Korpusa, njegovu dimenziju i značaj, kako za prostor tadašnjeg bihačkog okruga, tako i Bosne i Hercegovine u cjelini.

Prema riječima općinskog načelnika veoma je važno da se kontinuirano održavaju i obilježavaju ovi datumi, kako zbog prošlosti, tako i zbog naše zajedničke

budućnosti. Govorio je o protekloj borbi i njenim rezultatima, a zatim se osvrnuo i na današnju situaciju u društvu. „Mi živimo ovdje i sada i nemamo namjeru tražiti sreću bilo gdje drugo. Zbog toga radimo na tome da život ovdje bude bolji i kvalitetniji u svakom pogledu. Taj rad podrazumjeva na početku iskrenu namjeru, a zatim znanje i sposobnost. Rukovodeći se takvom formulom u proteklom smjenu pokrenuli čitav niz pozitivnih promjena u našem kraju i s njima nastavljamo i dalje“, riječi su načelnika Ogrševića.

Nakon svečanog dijela za postače je upriličen iftar na školskom igralištu, u organizaciji MZ Šturlić, Općine Cazin i uz podršku muslimanske fondacije iz Amerike (Zakat Foundation of America), čiji su predstavnici također prisustvovali ovom događaju i zajedničkom iftaru.

Iftaru je prisustvovalo preko 700 postača, kojima se na kraju kratko obratio i muftija bihački Hasan ef. Makić.



Načelnik sa donatorima



Iftar

U Šturliću obilježen Dan patriota

Odlukom OV Cazin 28. august se u našoj općini obilježava kao Dan patriota. Svake godine se na prigodan način obilježi ovaj datum i ukaže na značaj patriotskog djelovanja, kako u ratnom periodu, tako i u mirnodopsko vrijeme. Ovogodišnji program je započeo dočekom grupe naših patriota, koji su u dva dana prošli istu dionicu puta preko Slunjskih brda. Ovim putem su u ratu prošle stotine boraca, patriota, koji su došli braniti svoju domovinu. Zbog toga se ovim činom prisjećamo onih koji su dali veliki doprinos odbrani BiH i slobodi koju danas uživamo. Prvobitno je položeno cvijeće na spomen obilježje patriotima BiH i na šehidskom obilježju u MZ Šturlić, a potom je proučena Fatiha pred duše umrlih mještana ove MZ.

Riječi dobrodošlice prisutnima uputili su predsjednik MZ Šturlić Ramiz Bećirević, kao i šturlićanin Haris Ćoralčić, predsjedavajući OV-a Cazin. Pozdravne riječi imao je i Šaćir Srebrenica, predsjednik Saveza logoraša BiH i Smail Halkić, jedan od učesnika marša '92, te predsjedavajući Skupštine USK-a Admir Hadžipašić, Ministar za boračka pitanja u Vladi USK-a Mirsad Topčagić i Ministar zdravstva i socijalne politike USK Amir Murić.

U ime grada Slunja na ovom skupu se pojavio i kratko se obratio dogradonačelnik Slunja Nikola Japunčić. Kao i obično na kraju se obratio domaćin i pokrovitelj manifestacije općinski načelnik Nermin Ogršević.



Dogradonačelnik grada Slunja

„Danas patriotizam ne moramo dokazivati oružjem i prolijevanjem krvi, ali ga dokazujemo svakodnevnim životnim djelovanjem. Dok smo u ratu patriote prepoznavali po uniformama, herojskim podvizima s prvih linija ili po ranama, danas ih prepoznavamo po nesebičnom trudu i radu za ovu zemlju i za dobrobit zajednice u kojoj živimo. Ukoliko želimo jaku zemlju koju se neprijatelji više neće usuditi napasti ni na koji način, moramo imati jake građane, a za jake građane neophodni su dobri i sigurni životni uslovi. Domovina se brani srcem, a gradi znanjem i radom“, rekao je načelnik Ogršević.

Na kraju program nekoliko koreografija KUD Šturlić razveselilo je sve prisutne.

Doček učesnika marša



Svečani dio programa

U MZ Krivaja obilježen Dan pobjede

Ovogodišnje obilježavanje godišnjice slamanja agresorske ofanzive „spržena zemlja“ u MZ Krivaja počelo je učenjem Jasin-i-šerifa i tevvida pred duše šehida ove MZ-e. Pored članova porodica šehida, ovom događaju je prisustvovao i veliki broj njihovih bivših saboraca, predstavnici lokalne i kantonalne vlasti.

Usljedio je obilazak šehidskih obilježja, učenje fatihe i polaganje cvijeća, sa nadom i željom da se na ovaj način ti događaji i ljudi koji su u njima učestvovali, otrgnu od zaborava.

Centralna svečanost je održana ispred područne škole u Krivaji, gdje se okupio veliki broj mještana, gostiju i zvaničnika. U ime mještana MZ Krivaja prisutnima je dobrodošlicu izrazio Ferid Lulić, predsjednik Savjeta MZ Krivaja, koji je naglasio da se ovim obilježavanjem evociraju uspomene na slamanje jedne od najžešćih ofanziva.

Ibrahim Nadarević, ratni komandant 517. lake brdske brigade u svom je obraćanju naglasio da je agresor imao za cilj uništenje tzv. drugog džepa, tj. Bihaćkog okruga. Ukazao je na simboličnu vezu Cazina i Srebrenice koju su smatrali prvim džepom u ovim borbama. U ime kantonalnih institucija prisutnima se obratio ministar za boračka pitanja u vladi USK-a Mirsad Topčagić, koji je naglasio da se za svakog pojedinca, ali i zajednicu bitne tri stvari: istina, borba i pravda. On smatra da borba za istinu i pravdu traje i danas i da ona ima svoj kontinuitet. „Zbog toga nam je potrebno jako puno znanja i mudrosti, jer samo na takav način možemo biti uspješni u svojoj namjeri“, naglasio je ministar Topčagić.

Na kraju se prisutnima obratio domaćin i pokrovitelj manifestacije, načelnik općine Cazin, Nermin Ogršević. „Mi smo svoju zemlju odbranili pobjedom i hrabrošću naših boraca i naših vojnika i zbog toga trebamo biti ponosni na našu Armiju. Ona je sigurno najznačajnija institucija u našoj povijesti. Moramo biti ponosni i na naš V Korpus i naše heroje. Naglašavam da je značajno da se



Ministar Topčagić

prisjećamo odbrane, jer je na njenim temeljima nastala naša država Bosna i Hercegovina. Važno je da se prisjećamo tih događaja ne samo radi nas, već i radi onih koji tada nisu bili rođeni, kao i radi onih koji će tek doći. Pobjeda je pokazala da je zajedništvo bilo ključ tadašnjeg uspjeha i putokaz kako trebamo u budućnosti raditi. Pred nama su izazovi svakodnevnice, izazovi razvoja naše zajednice u privrednom i društvenom smislu. Danas opet moramo tražiti modalitete kako da to zajednički ostvarimo“, riječi su načelnika Ogrševića.

Ovu svečanost su upotpunili članovi mjesnih KUD-ova Pobjeda i Krivaja, a nakon svečanog programa, zajedničkog klanjanja akšam namaza, domaćin je za goste priredio i veliki zajednički iftar.



Učenje fatihe



U Cazinu je i ove godine svečano obilježen 6. august, Dan općine Cazin i 17. godišnjica deblokade Bihaćkog okruga. Nakon prijema za dobitnike najviših ratnih priznanja „Zlatni ljiljan“, održana je i tradicionalna svečanost „Pečat slobodi“ u Tržačkim Raštelima. Kako je istaknuo općinski načelnik Nermin Ogrješević, višestruka simbolika ovog datuma i danas šalje brojne poruke.

„U ratu smo dokazali da kada smo zajedno i zbijeni u čvrste redove možemo pobijediti najveće neprijatelje. Danas, općina Cazin dokazuje da zajedno, predanim i marljivim radom postizemo izuzetne rezultate pa smo se u svom bližem i širem okruženju, po brojnim infrastrukturnim projektima, nametnuli kao primjer koji mnogi nastoje slijediti. Lijepo je imati priliku na Dan općine govoriti o njenim uspjesima“, riječi su načelnika Ogrješevića.

Dan općine Cazin, na svečanom skupu u Tržačkim Raštelima gdje su se 6. augusta 1995. godine susreli pripadnici Petog korpusa Armije R BiH i Hrvatske vojske, čestitali su i ratni komandant 510. Bosansko oslobodilačke brigade Amir Avdić i ministar za boračka pitanja u Vladi USK Mirsad Topčagić. Kako je kazao major Avdić, biti pripadnik Petog korpusa bila je istinska čast, a ministar Topčagić je naglasio da je ovo proslava slobode koja je prvi i glavni faktor življenja i radnih uspjeha.



„Odlučnošću ovog ovdje naroda da ostane svoja na svome, opstali smo i izdržali 1.201 dan opsade.“, kazao je ratni komandant Petog korpusa Armije BiH general Atif Dudaković i dodao: „Borili smo se protiv sedam srpskih korpusa, raznoraznih legija, božovića, mauzera, orlova i domaćih izdajnika, ali smo pobijedili i sve smo izdržali, jer smo se odlučno borili za svoju državu!“



Član ratnog Predsjedništva BiH akademik Ejup Ganić u svom je obraćanju naglasio da ga susret s Krajišnicima podsjeća na teška, ratna vremena u kojima je također, pohodio ovaj kraj. „Sjećam se da sam u augustu 1995. godine, gledajući susret generala Dudakovića i Marekovića na ovom ovdje mjestu, zabilježio da nikada nisam imao osjećaj da imam više braće i sestara kao tada, a danas sam razmišljao kako bi bilo lijepo da se na ovom mjestu sada i u budućnosti sastaju privrednici i biznismeni BiH i Hrvatske“.

Bivšeg predsjednika R Hrvatske Stjepana Mesića u općini su Cazin dočekali kao velikog i dokazanog prijatelja, a on je kazao: „Došao sam vam čestitati Dan općine Cazin, pozdraviti ratne pobjednike i pokloniti se šehidima i njihovim obiteljima.“ Mesić je kazao da su dvije zemlje zajedno odgovorile na velike izazove, ali da to moraju činiti i u budućnosti i ponovio da Hrvati iz BiH moraju svoja pitanja riješavati u svojoj domovini čiji glavni grad je Sarajevo te da ista poruka mora doći i bosansko-hercegovačkim Srbima iz Beograda.

Program su dopunili i obogatili Vojni orkestar Oružanih snaga BiH i počasni vod drugog pješadijskog bataljona Šeste brigade Oružanih snaga BiH.



Dana 22. augusta u Cazinu je na centralnom šehidskom spomeniku obilježen Dan šehida, koji je kao takav uspostavljen Odlukom Rijaseta IZ. Nakon polaganja cvijeća proučen je i Jasin-i-šerif pred duše stotina cazinskih šehida.

Pred velikim brojem predstavnika političkog i vjerskog života, kao i boračkih organizacija, u kratkom obraćanju općinski načelnik Nermin Ogrješević je pored poziva na jedinstvo i zajedništvo istaknuo:

„Kao što znamo, šehidi su najzaslužniji za slobodu koju danas uživamo, oni su dali svoje živote za slobodu Bosne i Hercegovine i drugi dan Bajrama prisjećamo se njih, ali i naše cjelokupne borbe. Naravno šaljemo i poruku ovim mlađim naraštajima, kao i ostalima, da nismo zaboravili na kojim temeljima je nastala Bosna i Hercegovina i kakve žrtve smo morali podnijeti da bi odbranili svoju zemlju. To je vrlo bitno znati za izgradnju budućnosti, jer ta činjenica kod nas mora da probudi veliki osjećaj odgovornosti u vršenju današnjih dužnosti. To je upravo i moja današnja poruka. Imamo zadatak da ojačamo i izgradimo našu državu pa se prema tome moramo baviti pravim poslovima, pravim temama, a ne nekim beznačajnim, dnevnopolitičkim ili nekim kratkoročnim stvarima.“

Prisutnima se obratio i ministar za pitanje boraca u Vladi USK, koji je izrazio nezadovoljstvo trenutnim stanjem u ovoj oblasti.

„Ja vjerujem da se diljem naše države na adekvatan način obilježava ovaj dan, učenjem Jašina i drugim prigodnim programima, ali vjerujem da na području Općine Cazin, ovo stanovništvo posebno gaji ljubav i osjećaj prema ljudima koji su poginuli za ovu državu i dali svoje živote, ne umanjivajući ulogu ostalih ljudi koji su dali svoje doprinose za ovu zemlju. Kada je u pitanju oblast boračko-invalidske zaštite, moram istaknuti da možda ista nije na zadovoljavajućem nivou, ali je naša obaveza, posebno ljudi koji su na odgovornim funkcijama, da njihov status poboljšamo“, rekao je ministar Topčagić.

Nakon svečanog i zvaničnog dijela na centralnom šehidskom obilježju općinski načelnik u svom kabinetu upriličio je prijem za sve prisutne.





Načelnik Ogrješević osvojio treći uzastopni mandat

Nakon što su objavljeni rezultati lokalnih izbora 2012. godine, mr. Nermin Ogrješević, postao je novi stari načelnik općine Cazin. Trećim mandatom građani su potvrdili svoje povjerenje u ličnost i djelo prvog čovjeka Cazina. Rezultate izbora potvrdila je i CIK uručjenjem certifikata za potvrdu mandata na svečanosti koja je održana u Sarajevu 13. novembra.

„Iako su ova uvjerenja formalne prirode ona znače potvrdu da je naš dosadašnji rad bio iznimno uspješan i da su to moji sugrađani prepoznali. Ovdje počinje naredna faza razvoja naše općine u kojoj će se mnogo raditi, graditi i realizirati. Želimo da i nakon ovog mandata ostavimo dobre, ako ne i bolje, rezultate iza sebe. Zahvaljujem se svojim sugrađanima, prijateljima i komšijama na ukazanom povjerenju. Nadam se da ćemo i u budućem periodu raditi zajedno na zadovoljstvo svakog stanovnika općine Cazin“; rekao je načelnik Ogrješević nakon svečanog uručjenja certifikata CIK BiH.

Cazin info INFO BILTEN OPĆINE CAZIN

TEHNIČKI PODACI

Izdavač: Općina Cazin

Urednik: mr. Irma Alićajić

Lektor: EVRON s.p. Banja Luka

Dizajn: EVRON s.p. Banja Luka

Štampa: GRAFIS d.o.o. Cazin

Broj XIII - Decembar 2012.



www.opcinacazin.ba

e-mail: press@opcinacazin.ba